

Nakorsaatit pillugit Inatsisartut peqqussutaata allanngortinnissaanut Inatsisartut peqqussutaat (Nakorsaatit pillugit ataatsimiititaliap ingerlaavartumik nakorsaatinik akuerinnittarnissaanut periarfissaliissoq)

§ 1

Nakorsaatit pillugit Inatsisartut peqqussutaanni nr. 1-imi 12. maj 2005-imeersumi ima allannguuteqartitsisoqarpoq:

1. § 3, imm. 2, ima oqaasertalerneqassaaq:

"Imm. 2. Nakorsaatit pillugit ataatsimiititaliap aammattaaq suliasarai:

- 1) § 7, imm. 1, naapertorlugu nakorsaatit inatsisitigut akuerisaasut allattorsimaffiliornissaat.
- 2) Nakorsaatit assigiinngitsut pigineqartut pisariillisarnissaat nakorsaatinillu atuinerup annikillisarnissaa, katsorsaanerup ajunnginnerpaajunissaa, aningaasaqarneq, isumannaatsuunissaq katsorsaasarnermilu ileqqut eqqarsaatigiitigalugit.
- 3) Nakorsaatit atorlugit katsorsaasarnerup pisariitsuunissaanut tunngaviusut qulakkeernissaat, tassunga ilanngullugit nakorsaatinik passussinerup atuinerullu qularnaatsuunissaat aningaasartuutillu sapinngisamik annikitsuutinniarnissaat.
- 4) Nakorsaatinik atuineq nappaatillu ineriartornerat malinnaaffigissallugit.
- 5) Nakorsaatit passunneqartarneranni innersuussisarnermilu pitsaassutsip qulakkeernissaanut peqataanissaaq."

2. § 3-mi, imm. 3-p, kingorna nutaatut ivertinneqassaaq:

"Imm. 4. Nakorsaatit pillugit ataatsimiititaliap piffissap sivikitsup ingerlanerani ataatsimiissinnaanngippat Nakorsaatit pillugit ataatsimiititaliap siulittaasua Nakorsaatit pillugit ataatsimiititaliap sinnerlugu aalajangiisinnaavoq, suliamik ilisimasallit attuumassuteqartut siunersioreernerisa kingorna tamanna pisinnaalluni."

Imm. 4, tamatuma kingorna imm. 5-itut inissippoq.

3. § 7 ima oqaasertalerneqassaaq:

"§ 7. Nakorsaat inatsisitigut akuerisaasutut isigineqassaaq Nakorsaatit pillugit ataatsimiititaliap nakorsaatit allattorsimaffisa uku arlaannut ilanngutereerpagu:

- 1) Nakorsaatit innersuussutigineqartussaasut nalunaarutigineqartussaasullu (allattorsimaffik A).
- 2) Nakorsaatit innersuussutigineqartussaasut (allattorsimaffik B).
- 3) Nakorsaatit pisiassat (allattorsimaffik H).

Imm. 2. Nakorsaatit allattorsimaffii minnerpaamik qaammammut ataasiarluni iluarsaanneqartassapput tamanullu saqqummiunneqarlutik peqqinnissaqarfiup nittartagaani.

Imm. 3. Nakorsaatit, imm. 1, naapertorlugu nakorsaatitut inatsisitigut akuerisaasutut akuerineqanngitsut Nakorsaatit pillugit ataatsimiititaliaq akuersissuteqaqqaartinnagu:

1) Eqqunneqarsinnaanngillat, anninneqarsinnaanngillat, nioqqutigineqarsinnaanngillat, agguanneqarsinnaanngillat allatigulluunniit kaaviartinneqalersinnaanngillat.

2) Passunneqarsinnaanngillat.

3) Innersuussutigineqarsinnaanngillat allatigulluunniit inunnik uumasunilluunniit nakorsaanermi nappaatillu suussusersiornerini atorneqassanngillat."

4. § 8, ima oqaasertalerneqassaaq:

"§ 8. Nakorsaatip sunniuteqarnerata, ilakutaqarnerata imaluunniit pissutsit allat pingaaruteqartut nioqqusiap allagartaanit allaanerunerat akuersaarneqarsinnaasumik tunngavissaqartumik pasineqarpat § 7, imm. 1-imi nakorsaatit allattorsimaffiini ilaatinneqartunik Nakorsaatit pillugit ataatsimiititaliaq inerteqquteqarsinnaavoq. Tassunga atatillugu nakorsaatip taassuma erseqqinnerusumik innersuussineq malillugu peerneqarnissaa, tunniunneqarnissaa suujunnaarsinneqarnissaaluunniit Nakorsaatit pillugit ataatsimiititaliamit peqqussutigineqarsinnaavoq."

5. § 24, imm. 1 aamma 2, ima oqaasertalerneqassapput:

"§ 24. § 6, imm. 1, § 7, imm. 3, § 9, imm. 1, § 10, imm. 1 aamma 2, § 13, imm. 1, § 14, imm. 1, § 16, imm. 1 aamma 2, § 18, imm. 1, § 19, imm. 1 aamma 2, § 20 aamma § 21, imm. 1, naapertorlugit aalajangersakkanik unioqqutitsinerit pillugit akiliisitsisoqarsinnaavoq. § 8-p nassatarisaanik peqqusissummik inerteqqummilluunniit naapertuutsitsinnginneq akiliisitsinertaqarsinnaavoq.

Imm. 2. § 8 aamma § 9, imm. 1, naapertorlugit aalajangersakkanik unioqqutitsinikkut nakorsaatit pineqartut arsaarinnissutigineqarsinnaapput."

6. § 24-mi imm. 4-p kingorna nutaatut ivertinneqassaaq:

"Imm. 5. Najoqqutassiani peqqussut manna naapertorlugu sananeqartuni aktieselskabip, anpartsselskabip, andelsselskabip assigisaasaluunniit unioqqutitsinerisa akiliisitaanermik pineqaatissinneqarsinnaaneratt pillugu maleruagassiortoqarsinnaavoq. Aammattaaq kommunalbestyrelset, nunaqarfinni aqutsisut il.il. pillugit inatsisartut inatsisaanni § 64-imi pineqartut pillugit Namminersornerullutik Oqartussat, kommunip kommuniluunniit ataatsimoorussat unioqqutitsinerisa akiliisitaanermik pineqaatissinneqartarnissaat pillugu maleruagassanik aalajangersaasoqarsinnaavoq."

7. § 25, imm. 4, ima oqaasertalerneqassaaq:

"Imm. 4. § 6, imm. 1, § 7, imm. 3, § 16, imm. 1 aamma 2, kiisalu §§ 19-21 naapertorlugit aalajangersakkat eqquutinneqarnissaat Peqqinnissakkut Nakkutilliisoqarfiup nakkutigaa."

§ 2

Inatsisartut peqqussutaat atuutilerpoq ulloq 1. juli 2006. Atortuulersitsinerup peqatigisaanik nakorsaatit inatsisitigut akuerisaasut pillugit nalunaarut nr. 22, 14. november 2005-imeersoq atorunnaarsinneqarpoq.

Namminersornerullutik Oqartussat, ulloq 1. juni 2006

Hans Enoksen

/

Asii Chemnitz Narup

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut